

Mungu Hatawasahau Watoto Wake,

Maana yeye awagusaye ninyi aigusa mboni ya jicho lake. Zekaria 2:8.

Wakati amri itakayotolewa na watawala mbalimbali wa ulimwengu wa Kikristo dhidi ya watunza amri itakapoondoa ulinzi wa serikali na kuwaachia mikononi mwa wale wanaotamani kuwaua, watu wa Mungu watakimbia kutoka mijini na vijijini na watajiunga pamoja katika vikundi, wakiishi katika maeneo ya mbali na yaliyojificha. Wengi watajificha katika ngome za milima. Kama Wakristo wa mabonde ya Piedmonti, watatumia vilele vya milima kuwa maficho na watamshukuru Mungu kwa ajili ya “ngome ya majabali” (Isaya 33:16). Lakini mengi katika mataifa yote na matabaka ya wote, ya juu na ya chini, matajiri na maskini, weusi na weupe, watatupwa katika utumwa wa kidhalimu na katili kuliko utumwa mwingine wowote ule. Wapendwa wa Mungu wanapitia katika siku za uchovu, wakiwa wamefungwa kwa minyororo, wakiwa wamefungwa magerezani, wakiwa wamehukumiwa kuuawa, baadhi wakiwa wameachwa wafe kwa njaa gizani na kwenye magereza machafu. Hakuna sikio la kibinadamu lililo tayari kusikia vilio vyao; hakuna mkono wa kibinadamu ulioko tayari kutoa msaada.

Je, Bwana atawasahau watu wake katika saa hii ya ngumu? Je, Mungu alimsahau Nuhu aliyekuwa mwaminifu wakati hukumu ilipomwagwa juu ya ulimwengu wakati wa Gharika? Je, Mungu alimsahau Lutu wakati moto uliposhuka kutoka mbinguni kuiteketeza miji ya uwandani? Je, Mungu alimsahau Yusufu alipokuwa amezungukwa na waabudu sanamu wa Misri? Je, Mungu alimsahau Eliya wakati kiapo cha Yezebeli kilipomtisha baada ya kuwaua manabii wa Baali? Je, alimsahau Yeremia katika shimo lenye giza na kina kirefu la nyumba ya gereza lake? Je, Mungu aliwasahau vijana watatu wa Kiebrania katika tanuru liwakalo moto? Je, Mungu alimsahau Danieli katika tundu la simba? ...

Ingawa adui waweza kuwatupa gerezani, bado kuta za gereza haziwezi kukata mawasiliano kati ya roho zao na Kristo. Yeye aonaye kila udhaifu wao, Yeye ajuaye kila jaribu lao, yuko juu ya mamlaka zote za kidunia; na malaika watawatembelea katika vyumba vyao vya upweke, kuwaletae nuru na amani kutoka mbinguni. Gereza litakuwa kama ikulu; kwa kuwa wenye imani kubwa wanaishi pale, na kuta zenye huzuni zitaangaziwa kwa nuru ya mbinguni kama wakati ule Paulo na Sila walipoimba nyimbo za sifa katika usiku wa manane katika gereza la Filipi. (Pambano kuu. Uk. 515, 516).

Kwa shauku ya dhati, watu wa Mungu wanasubiri kuona ishara za Mfalme wao ajaye ... Nuru inaangaza juu ya mawingu yaliyoko juu ya vilele vya milima. Muda si mrefu kutakuwepo na udhihirishaji wa utukufu Wake. Mbingu zinang'aa kwa pambazuko la siku ya umilele, na kama sauti nzuri ya nyimbo za malaika maneno yanasikika: “Simama imara katika utii wako. Msaada unakuja.” Kristo, Mshindi Mwenyezi, anawavalisha askari Wake waliochoka taji ya utukufu usioharibika; na sauti inatoka nje ya malango yaliyofunguliwa wazi: ... “...Vita yako siyo dhidi ya maadui ambao hawajajarihiwa. Nimepigana vita kwa ajili yenu, na katika jina Langu ninyi ni zaidi ya washindi.” (Pambano Kuu. Uk. 521).